

Umimmaat piniagaanerat illersugaanerallu pillugit Namminersorlutik Oqartussat nalunaarutaat

Piniarneq aallaaniarnerlu pillugit Inatsisartut inatsisaanni nr. 34-mi, 13. juuni 2023-meersumi kingornalu allannguummi, § 2, imm. 3, § 4, imm. 2, § 13, imm. 6, § 15, imm. 1 aamma imm. 2, § 16, imm. 4, § 19, § 20, imm. 1, § 22, imm. 8, § 23, imm. 4, § 25, imm. 1, 2. pkt., imm. 5 aamma 7, § 26, imm. 1-4, § 28, § 29, imm. 1, aamma § 39, imm. 1, nr. 4, imm. 2-4 kiisalu qimmeqarneq qitsuuteqarnerlu pillugit Inatsisartut inatsisaanni nr. 18-imi, 30. oktober 1998-imeersumi § 3, imm. 2, naapertorlugit aalajangersarneqarpoq:

Kapitali 1

Atuuffik aamma nassuiaatit

Atuuffik

§ 1. Nalunaarut manna Kalaallit Nunaanni umimmaat nujuartat (*Ovibos moschatus*) piniarneqarnissaannut illersorneqarnissaannullu atuuppoq.

Nassuiaatit

§ 2. Nalunaarummi matumani uku imatut paasineqassapput:

- 1) "Umimmaat": Umimmaat aqutsiveqarfinni pineqartuni aallaqqaataanit pisut aamma umimmaat ingerlaarnikut imaluunniit umimmaat nuutat aqutsiveqarfinnut nutaanut eqqunneqartut.
- 2) "Aqutsiveqarfii": Kalaallit Nunaanni nunap immikkoortuinut kommuneqarfinnullu aggorneqarnera pillugu Inatsisartut inatsisaanni § 2 naapertorlugu kommunit killeqarfii.
- 3) "Assartuutit motorillit": Assartuutit motorillit suulluunniit nunakkut sikukkullu umimmannik piniarnermut atatillugu atorineqartartut imaluunniit piniarfimmut piniarfimmiilluunniit assartuutitut atorineqartartut.
- 4) "Akiliuteqarluni piniarneq": Akiliuteqarluni umimmanniarneq akiliuteqartitsinikkut aallaaniarnermik aaqqissuussisartumit akuerisaasumit aaqqissorneqartoq.

Kapitali 2

Eqqissisimatitsineq

§ 3. Umimmaat Kalaallit Nunaanni tamarmi eqqissisimatitaapput, taamaattorli §§-ni 4-mi, 6-mi aamma 8-mi pineqartut pineqanngillat.

Imm. 2. Umimmaat Kalaallit Nunaanni sumiiffimmiit ataatsimiit sumiiffimmut allamut ingerlaarnikut imaluunniit nuunneqarsimasut Naalakkersuisumit piniarnermut akisussaasuusumit killilersukkamik piniarnissaq imaluunniit akiliuteqarluni aallaaniarneq pillugu aalajangiisoqartinnagu eqqissisimatitaapput.

Imm. 3. Umimmaat piaqqiorfiup nalaani piffissami 15. aprili-miit 31. maaji ilanngullugu ujtartornissaat akornusersornissaallu inerteqqutaavoq.

Imm. 4. Umassusilerinermik siunnersuineq aamma piniartut atuisullu ilisimasaat tunngavigalugu Naalakkersuisoq piniarnermut akisussaasuusoq nunaminertanik piffissanillu umimmannut mianerisassanik suliaqarfusunillu killilersimaarfigineqarfusussanik toqqaasinnaavoq.

Kapitali 3

Pisassiissutininik, piffissaliussanik piniarfusussanik aamma piniarfissanik aalajangersaaneq

Pisassiissutininik aalajangersaaneq agguaaassisarnerlu

§ 4. Umassusilerinermik siunnersuisoqareernerup kingorna aamma piniartut atuisullu ilisimasaat tunngavigalugit Naalakkersuisoq piniarnermut akisussaasuusoq umimmaqatigiinnut ataasiakkaanut umimmannik piniarnissamut pisassiissutininik aalajangersaassaaq.

Imm. 2. Pisassiissutit, imm. 1 naapertorlugu, umassusilerinermik tunngaveqartumik, piniarnikkut eqqarsaatigisassat pillugit imaluunniit umimmaqatigiit eqqarsaatigalugit, tassunga ilanngullugit silap pissusianut tunngassuteqartut kinguner, umimmannut utoqqaassutsimikkut, suaassutsimikkut aamma piniariaatsinut kulturimut tunngassuteqartunut aalajangersimasunut immikkoortinneqarlutik, soorlu assersuutigalugu qimussimik umimmanniarnermut, aalajangersarneqarsinnaapput.

Imm. 3. Umimmaqatigiinnut umassusilerinermik siunnersuisoqanngippat pisassiissutit Naalakkersuisumit piniarnermut akisussaasuusumit mianersornissaq tunngavigalugu aalajangersarneqassapput.

Imm. 4. Naalakkersuisoq piniarnermut akisussaasuusoq pisassiissutininik imm. 1 malillugu aalajangersarneqartunik aqutsiveqarfinnut agguaaassissaaq.

Imm. 5. Piniarneq pillugu Siunnersuisoqatigiinni ilaasortat aamma inuussutissarsiuutigalugu piniartut kattuffii/peqatigiiffii pisassiissutininik aalajangersaasoqannginnerani tusarniarneqassapput, soorluttaaq tamanut ammasumik tusarniaasoqassasoq.

Imm. 6. Umimmannik nunap immikkoortuata ataatsip killeqarfiata iluani pisassiissutit atunngitsuukkat pisassiissutininut tamarmiusunut nunap immikkoortuanut pineqartumut ukiup pisassiiffiusup tullianut nuunneqarsinnaapput. Aqutsiveqarfikkaartumik aamma nuussisoqarsinnaavoq. Pisassiissutininik tamakkerneqanngitsoortunik nuussinermi periuseq tassaavoq ukiumiit ukiumut amerliartuutaanngitsumik nuussineq.

Kommunalbestyrelsip pisassiissutininik agguaanera

§ 5. Kommunalbestyrelsip § 4, imm. 4, malillugu pisassiissutit agguaanneqartut aqutsiveqarfinni ataasiakkaani illoqarfinnut aamma inoqarfinnut agguarsinnaavai, taamaattoq imm. 2 takuuk.

Imm. 2. Pisassiissutininik agguaaassineq sioqqullugu aqutsiveqarfinni inuussutissarsiuutigalugu piniartut kattuffisa / peqatigiiffisa tusarniarneri kommunalbestyrelsip ingerlattassavai, soorluttaaq

aqutsiveqarfinnut tamanut ammasumik tusarniaaneq ingerlattassallugu.

Imm. 3. Kommunalbestyrelsi imm. 1 malillugu pisassiissutininik agguassinerup angusat inerneru pillugit Piniarnermut Naalakkersuisoqarfimmut pisassiissutininik agguassinerup kingorna kingusinnerpaamik sapaatip akunnerata 1-p qaangiunnerani allakkatigut nalunaaruteqassaaq.

Piffissaliussanik piniarfiussanik aalajangersaaneq

§ 6. Umassusilerinermik siunnersuuteqareernerup kingorna kiisalu piniartut atuisullu ilisimasaat tunngavigalugit Naalakkersuisoq piniarnermut akisussaasuusooq killilersukkamik umimmanniarnissamut aamma akiliuteqarluni umimmanniarnissamut piffissaliussanik aalajangersaassaaq.

Imm. 2. Imm. 1-imi umimmanniarnissamut piffissaliussat 1. agusti-miit 15. aprili-mut piffissap iluani taamaallaat aalajangersaaffigineqarsinnaapput, taamaattoq § 35, imm. 2 takuuk.

Imm. 3. Piniarnek pillugu Siunnersuisoqatigiinni ilaasortat aamma inuussutissarsiutigalugu piniartut kattuffii / peqatigiiffii piffissaliussanik piniarfiussanik aalajangersaasoqannginnerani tusarniarneqassapput, soorluttaaq tamanut ammasumik tusarniaasoqassasoq.

Kommunalbestyrelsip piniarnissamut piffissaliussanik aalajangersaanera

§ 7. Kommunalbestyrelsi § 6, imm. 1, malillugu umimmanniarnissamut piffissaliussat aalajangersarneqartunut sinaakkutit iluanni umimmaqatigiit ataasiakkaanut aqutsiveqarfiit ataasiakkaat iluani umimmanniarnissamut piffissaliussanik aalajangersaasinnaavoq, taamaattoq imm. 2 takuuk.

Imm. 2. Kommunalbestyrelsip imm. 1 malillugu umimmaqatigiinnut ataasiakkaanut umimmanniarnissamut piffissaliussanik aalajangersaannginnerani aqutsiveqarfimmi inuussutissarsiutigalugu piniartut kattuffii / peqatigiiffii tusarniartassavai kiisalu tamanut ammasumik tusarniaaneq ingerlattassallugu.

Imm. 3. Kommunalbestyrelsi umimmanniarnissamut piffissaliussat aalajangersarneqartut pillugit Piniarnermut Naalakkersuisoqarfimmut aalajangersaanerup kingorna kingusinnerpaamik sapaatip akunnerata 1-p qaangiunnerani allakkatigut nalunaaruteqassaaq.

Piniarfissanik aalajangersaaneq

§ 8. Umassusilerinermik siunnersuuteqareernerup kingorna kiisalu piniartut atuisullu ilisimasaat tunngavigalugit Naalakkersuisoq piniarnermut akisussaasuusooq killilersukkamik umimmanniarnissamut piniarfissanik aalajangersaassaaq.

Imm. 2. Piniarnek pillugu Siunnersuisoqatigiinni ilaasortat aamma inuussutissarsiutigalugu piniartut kattuffii / peqatigiiffii piniarfissanik aalajangersaasoqannginnerani tusarniarneqassapput, soorluttaaq tamanut ammasumik tusarniaasoqassasoq.

Kommunalbestyrelsip piniarfissanik aalajangersaanera

§ 9. Kommunalbestyrelsip piniarfiit § 8, imm. 1, malillugu aalajangersarneqartut killilersinnaavai, taamaattoq imm. 2 takuuk.

Imm. 2. Kommunalbestyrelsi imm. 1 naapertorlugu piniarfissanik aalajangersaannginnerani aqutsiveqarfimmi pineqartumi inuussutissarsiutigalugu piniartut kattuffii / peqatigiiffii tusarniartassavai, soorluttaaq tamanut ammasumik tusarniaaneq ingerlattassallugu.

Imm. 3. Kommunalbestyrelsi piniarfissat imm. 1 malillugu aalajangersarneqartut pillugit Piniarnermut Naalakkersuisoqarfimmut aalajangersaanerup kingorna kingusinnerpaamik sapaatip akunnera 1-p qaangiunnerani allakkatigut nalunaaruteqassaaq.

Kapitali 4

Killilikkanut umimmanniarnissamut akuersissutinik agguaassineq

Killilikkanut umimmanniarnissamut akuersissutinik tunniussineq

§ 10. Killilikkanut piniarnissamut akuersissutinik tunniussineq inuussutissarsiutigalugu piniartunut ataasiakkaanut taamatullu sunngiffimmi piniartunut ataasiakkaanut qinnuteqartitsinikkut pissaaq.

Imm. 2. Piniarnermut Naalakkersuisoqarfiup inunnut aqutsiveqarfinni allani najugaqartunut akuersissutit amerlassusaat killilersinnaavaa.

§ 11. Kommunalbestyrelsi, §§ 4, 6 aamma 8 malillugit pisassiissutit, piniarfiit aamma piniarnissamut piffissaliussat aalajangersarneqartut iluanni, qinnuteqartunut atuuttumik piniarsinnaanermut allagartalinnut aamma aqutsiveqarfimmi inuit allattorsimaffianni najugalittut nalunaarsorsimasunut akuersissutinik agguaassisinnaavoq tunniussisinnaallunilu.

Imm. 2. Akuersissut qinnuteqartunut ukiup siuliani, § 30, imm. 1 malillugu, pisanik nalunaaruteqarsimasunut tunniunneqarsinnaavoq aamma qinnuteqartunut nutaanut imm. 1-mi aamma imm. 4-mi piumasaqaatinik naammassinnittunut tunniunneqarsinnaalluni.

Imm. 3. Naak imm. 1-imi aalajangersagaqaraluartoq, Piniarnermut Naalakkersuisoqarfiup inunnut aqutsiveqarfinni allani najugaqartunut aqutsiveqarfimmi piniarsinnaanissaat akuersissutigisinnaavaa, tamannalu aqutsiveqarfimmi pineqartumi killilerneqanngitsumik umimmanniarnissamut pisassiisoqartillugu aatsaat pisinnaavoq.

Imm. 4. Qinnuteqartut piffissami qinnuteqarfiusumi 15-inik ukioqalereersimassapput piniarnermullu allagartartik § 14, imm. 4-mi, piffissarititaasup iluani akilereersimassallugu.

Makitsinikkut akuersissutinik agguaassineq

§ 12. Aqutsiveqarfimmi imaluunniit kommunimi qinnuteqartut akuersissutinit tunniunneqarsinnaasunit amerlaneruppata, agguaassineq makitsinikkut pissaaq.

Imm. 2. Akuersissutit sinneruttut aammattaaq makitsinikkut agguaanneqassapput.

Imm. 3. Makitsinermut atatillugu kommuni qinnuteqartut akuersissutinik tunineqanngitsunut utaqquisut allattorsimaffiannik pilersitsissaaq. Utaqqisut allattorsimaffiat akuersissutinik kingusinnerusukkut agguaassisoqarqissappat atorneqassaaq, § 13, imm. 2, takuuk.

Imm. 4. Makitsineq tamanut ammasumik ingerlanneqassaaq. Kommunalbestyrelsi makitsinissaq kingusinnerpaamik ullorsiutit malillugit ullunik arfneq-marlunnik sioqqutsilluni, makitsinermut piffissaq sumiinnissaalu tamanut nalunaarutigissavaa.

Imm. 5. Aqutsiveqarfinni isorartuuni, piniarfissamut 100 kilometerit sinnerlugit immakkut nunakkulluunniit ingerlaarfiusariaqartuni, inuussutissarsiutigalugu piniartunut ataasiakkaanut umimmanniarneq imminut akilersinnaasunngortinniarlugu akuersissutinik arlalinnik tunniussisoqarsinnaavoq.

§ 13. Kommuni pineqarteq akuersissutit tunniunneqartut qaqugu aaneqareersimanissaannik piffissarititaasumik aalajangiissaaq. Inuit akuersissummik tunineqarsimasut akuersissummilli atuisinnaanngitsut imaluunniit atuiniannngitsut piaarnerpaamik akuersissut atorineqanngitsaq kommunimut utertissavaat.

Imm. 2. Akuersissutit aaneqanngitsut utertinneqarsimasullu kommunalbestyrelsemit ullup aalajangersarneqartup kingorna agguateqqinneqassapput. Akuersissutinik agguasseqqinneq utaqqisut allattorsimaffiat tamanut ammasoq naapertorlugu pissaaq, § 12, imm. 3 takuuk, akuersissutinillu utertisoqareernerup kingorna piaarnerpaamik pissalluni.

Kapitali 5

Killilikkamik piniarnissamut, tunisinissamut tuniniaanissamullu piumasaqaatit

Killilikkamik umimmanniarnissamut piumasaqaatit

§ 14. Inuit § 10 malillugu akuersissummik aamma piniarnermut atuuttumik allagartaqartut kisimik umimmanniaqqusaapput.

Imm. 2. Akuersissut inummut atiatigut taasamut taamaallaat atuuppoq allanullu tunniunneqaraniluunniit tunineqaqqusaanani.

Imm. 3. Akuersissummi qassinik, piniarnissamut piffissaliussami sorlermi, piniarfimmi sorlermi kiisalu umimmannik sorlernik piniartoqaqqusaanersoq allassimavoq.

Imm. 4. Piniarnermut allagartaq ukiumi pineqartumi 1. maaji sioqqullugu akilerneqareersimassaaq, taamaattoq § 35, imm.1, takuuk.

Tunitsivimmut tunisineq nalinginnaasumillu tunisineq

§ 15. Inuussutissarsiutigalugu umimmanniarsinnaanermut akuersissummi piumasarineqarsinnaavoq umimammik ilivitsumik ilaanilluunniit neqaarniarfimmut imaluunniit tunitsivimmut tunisinermi neqaarniarfimmut imaluunniit tunitsivimmut uumasut nakorsaqaarfaniit akuerineqarsimasumut tunisisoqassasoq imaluunniit inuussutissarsiutigalugu piniartoq tunisinissamut akuersissummik attuuttumik peqassasoq.

Imm. 2. "Kalaalimineerniarfinni" umimmannik tunisineq aamma tuniniaaneq taamaallaat piffissaliussani piniarfiusuni aamma piffissaliussap piniarfiusup qaangiunneranit ullorsiutit malillugit sivilunerpaamik ulluni pingasuni akuerisaavoq.

Kapitali 6

Piniariaatsit aamma piniarnermi ileqqorissaarneq

Inuussutissarsiutigalugu aamma sunngiffimmi qoorortuumik piniarneq

§ 16. Inuussutissarsiutigalugu aamma sunngiffimmi umimmanniarnermi taamaallaat qoorortoq ataatsimik sullulik patruuninillu ataasiakkaanik immertartoq atoqqusaavoq, imm. 2-3 takukkit, taamaattoq § 17 takuuk.

Imm. 2. Qoorortuumik umimmanniarnermi sulloqqortussutsit akuerisaasut minnerpaaffiat 6,5 x 55-iuvoq (aqerlup diameteria 6,5 mm). Qoorortuup imassaa qanoq ittuussanersoq nammineq toqqarneqarsinnaavoq.

Imm. 3. Qoorortoq sunaluunniit umimmanniarnermut atorneqartoq nakersarneqarsimassaaq paarilluagaallunilu.

Inuussutissarsiutigalugu aamma sunngiffimmi pisissimik piniarneq

§ 17. Inuussutissarsiutigalugu aamma sunngiffimmi umimmanniarnermi pisisseq inunnit Piniarnermut Naalakkersuisoqarfimmit akuerisaasunit atoqqusaavoq. Pisissimik piniarnermut Danmarkimi imaluunniit nunami allami assingusumi misilitsinnermi angusaqarnermit takussutissartaqartillugu Piniarnermut Naalakkersuisoqarfik akuersisummik tunniussisinnaavoq.

Imm. 2. Pisisseq atorlugu inuussutissarsiutigalugu aamma sunngiffimmi umimmanniarnermi piunasaqaatit ataani allassimasut naammassineqareersimassapput:

- 1) Pisisseq Compound-iussaaq aqqinneqarsinnaasumik umerfilik / nalunaaqutalik nusutsisinnaassusialu minnerpaamik 60 pund-iussaaq (28 kg.).
- 2) Qarsut aalajangersimasumik naqqoqassapput minnerpaamillu 525 grains-inik (34 gr.-inik) oqimaassuseqassallutik.
- 3) Qarsut mekanisk-iusumik naqqullit atoqqusaanngillat.

Piniarnermi ileqqorissaarneq

§ 18. Piniarnermi umimmaap pisarineqartup nerineqarsinnaasortai tamarmik nassarneqassapput.

Imm. 2. Piniarnermi pisap nerineqarsinnaanngitsortai pisaqarfup qimalernerani nassarneqassapput imaluunniit tupeqarfiit, illuaraqarfiit imaluunniit piniarnermik ingerlatat allat ingerlanneqarnissaat akornusernagit inissinneqassallutik.

Umimmammik pissatamik toqutsineq

§ 19. Umimmammik piniartup pisussaaffigaa umimmaap eqqorneqarnermi kinguninnguagut toqusimamera nalornisiginagu qulakkiissallugu.

Imm. 2. Umimmanniarnernup nalaani umimmammik pissaasup uumasooq piaarnerpaamik toqussavaa.

Imm. 3. Umimmak pissanneqartoq nanineqarnanilu toqunneqanngippat, piniartooq piniarnernup naammassineqarnerata kinguninnguagut Piniarnermut Naalakkersuisoqarfimmut imaluunniit piniarnermut nakkutilliisumut qaninnerpaamut pissutsit piviusut pillugit ilisimatitsissaaq.

§ 20. Inuk umimmanniarnermut piffissap ingerlanerani umimmammik pissanneqarsimasumik takunnittup, piaarnerpaamik naalliutsitsinnginnerpaamillu umimmak toqussavaa. Umimmak nerineqarsinnaasutut nalilerneqarpat, umimmak umimmammik toqutsisup pissavaa.

Imm. 2. Piffissap piniarfiusup avataani toqutsineq pisimappat umimmak toqutaq nikisinnagu qimanneqassaaq.

Imm. 3. Umimmak toqungasoq siumorneqartooq nikisinnagu qimanneqassaaq.

Imm. 4. Takunnittup pisussaaffigaa qanoq pisoqarnera, imm. 1-3 takukkit, piniariareernerup kingorna ullorsiutit malillugit kingusinnerpaamik ullut pingasut qaangiutsinnagit Piniarnermut Naalakkersuisoqarfimmut imaluunniit piniarnermut nakkutilliisumut nalunaarutigissallugu.

Kapitali 7

Akiliuteqarluni aallaaniarnermut immikkut piumasaqaatit pisanillu nalunaaruteqartarneq

Akiliuteqarluni piniarnermut immikkut piumasaqaatit

§ 21. Naalakkersuisoq piniarnermut akisussaasuusoq inuussutissarsiutigalugu aamma sunngiffimmi piniarnerup kiisalu akiliuteqarluni aallaaniarnerup akornanni pisassiissutiniq agguaassinermik aalajangersaassaaq.

Imm. 2. Akiliuteqarluni aallaaniarnermut pisassiissutit umimmanniarnissamut pisassiissutinit tamarmiusunit ilanngaatineqassapput, § 4, imm. 1, takuuk. Naalakkersuisoq piniarnermut akisussaasuusup pisassiissutit tamarmiusut, imm. 1 takuuk, uumassusilerinermik siunnersuineq piffissaq pisassiiviusup tamakkiisup ingerlanerani allanngussagaluarpat, nalimmassarsinnaavaa.

Imm. 3. Piniarnermut Naalakkersuisoq § 6, imm. 2, naapertorlugu umimmannik akiliuteqarluni aallaaniarnissamut piffissaliussanik 1-mik imaluunniit arlalinnik aalajangersaasinnaavoq.

Imm. 4. Kulavannik norrarnillu akiliuteqarluni piniarneq piffissami 1. martsimiit 31. juuli ilanngullugu inerteqqutaavoq.

Akiliuteqarluni qoorortuumik aallaaniarneq

§ 22. Akiliuteqarluni umimmannik aallaaniarnermi taamaallaat qoorortooq ataatsimik sullulik patruuninillu ataasiakkaanik immertartooq atoqqusaavoq, imm. 2-3 takukkit, taamaattoq § 23 takuuk.

Imm. 2. Qoorortuumik akiliuteqarluni umimmanniarnermi sulloqqortussutsit akuerisaasut minnerpaaffiat 7,62 x 63-iuvoq (aqerlup diameteria 7,62 mm) soorlu 30-06 aamma 308. Qoorortuup imassaa qanoq ittuussanersoq nammineq toqqarneqarsinnaavoq.

Imm. 3. Qoorortooq sunaluunniit akiliuteqarluni umimmanniarnermut atorineqartooq nakarsarneqarsimassaaq paarilluagaallunilu.

Akiliuteqarluni pisissimik qarsumillu aallaaniarneq

§ 23. Piniarnermut Naalakkersuisoqarfimmiit akuersisoqareerneratigut pisseq umimmannik akiliuteqarluni aallaaniarnermi pisissimik piniarnermut misilitsinnermi takussutissartalimmik

angusaqarsimasunit inunnit Danmarkimi imaluunniit nunami allami misilitsinnermi assingusuni angusaqarsimasunit atoqqusaavoq.

Imm. 2. Pisisseq qarsorlu atorlugit akiliuteqarluni umimmanniarnermi piumasaqaatit tullinnguuttut naammassineqarsimassapput:

- 1) Pisisseq Compound-iussaaq aaqqinneqarsinnaasumik umerfilik / nalunaaqutalik nusutsisinnaassusaalu minnerpaamik 60 pund-iussaaq (28 kg.).
- 2) Qarsut aalajangersimasumik naqqoqassapput minnerpaamillu 525 grains-inik (34 gr.-inik) oqimaassuseqassallutik.
- 3) Qarsut mekanisk-iusumik naqqullit atoqqusaanngillat.

Akiliuteqarluni aallaaniarnermi pisanik nalunaaruteqartarneq

§ 24. Akiliuteqarluni umimmanniarnermi pisat § 30-mi aalajangersagaqaraluartorluunniit quppersagaq PINIARNEQ imaluunniit www.sullissivik.gl aqqutigalugu nalunaarutigineqassapput.

Imm. 2. Akiliuteqarluni piniartitsinermik aaqqissuisut aammattaaq akuersissutini pisanik immersuiffissat atorlugit Piniarnermut Naalakkersuisoqarfimmut nalunaaruteqassapput. Tamatuma kingorna paasisutissat ataatsimoortillugit quppersagaq PINIARNEQ imaluunniit www.sullissivik.gl imaluunniit tutum@nanoq.gl aqqutigalugu nassiunneqassapput.

Kapitali 8

Umimmanniarnermi assartuutitik atuineq

Assartuutit motorillit

§ 25. Assartuutit motorillit umimmannik malersuinnermi ungoorinnermiluunniit atorneqaqqusaanngillat, taamaattoq § 27 takuuk.

Imm. 2. Assartuutitik motorilinnik nunaannarmi ingerlaarnermi umimmaat minnerpaamik 500 meter-inik ungasissuseqarluni qanillineqaqqusaapput.

Qimmit qimussillu

§ 26. Umimmanniarnermi qimmit nassaqqusaanngillat, taamaattorli imm. 2 takuuk.

Imm. 2. Qimminik qimuttoqarfiusuni allorniusap tukimukartup 44°W-p kangiatungaani allorniusallu sanimukartup 66°N-p avannaatungaani inissisimasuni qimussit assartuutitut atorneqaqqusaapput.

Imm. 3. Piniarfimmi qimminik qimuttunik qimatsisoqaqqusaanngilaq.

Imm. 4. Qimmit pituussaarlutik qimaasut tigoqqinnerlu sapernartut aallaaneqassapput.

Imm. 5. Qimmit toqungasut timaat piniarfimmi qimanneqaqqusaanngillat.

Imm. 6. Kingusinnerpaamik piniariarnerup naammassinerata kingornatigut qimminik qimuttunik piginnittup qimmit qimaasut pillugit piniarnermik nakkutilliisoq qaninnerpaaq nalunaarfigissavaa.

Kapitali 9

Umimmannik ungasineq

§ 27. Piniarnermut Naalakkersuisoqarfik neqip pitsaanerpaajunissaa siunertaralugu makkuninnga piomasaaqatitalimmik § 25, imm. 1-p, atuutsinneqannginnissaanut immikkut akuersissuteqarsinnaavoq:

- 1) Naalakkersuisoqarfik allakkatigut qinnuteqaammik tigusaqarsimassaaq,
- 2) qinnuteqaat unguisnermi peqataasussat allattorsimaffiannik, kiisalu piffissaq aamma unguisnissap sumiiffissaa pillugu paasissutissanik imaqassaaq aamma
- 3) unguisneq qamuteralaat, ATV imaluunniit qulimiguulik atorlugu ingerlanneqassaaq.

Imm. 2. Umimmannik unguisinnaanermut immikkut akuersissut taamaallaat inunnut inuussutissarsiutigalugu piniarsinnaanermut allagartalinnaat tunniunneqarsinnaavoq.

Imm. 3. Immikkut akuersissummut atatillugu Naalakkersuisoqarfiup akuersissut piomasaaqatitalersinnaavaa, tassunga ilanngullugu unioqqutitsineri kinguneqartitsinerit.

Kapitali 10

Umimmannik tiguisinerit nuussinerillu

§ 28. Naalakkersuisoq piniarnermut akisussaasuusoq qinnuteqartoqareerneratigut piniarnermik imaluunniit inuussutissarsiuteqarnermik siunertalinnut umimmaqatigiinnik pilersitsinissamut umimmannik tiguisinissamut nuussinermullu akuersissummik tunniussisinnaavoq.

Kapitali 11

Kommunit ileqqoreqqusaat

§ 29. Naalakkersuisut akuersereernerisigut kommunalbestyrelsi kommunimi ileqqoreqqusaliornikkut nalunaarummi matumani § 3-mi, § 4-mi, § 6-mi, § 8-mi aamma § 18-mi aalajangersakkanit akimmisaarnarnerusunik piomasaaqateqarsinnaavoq.

Kapitali 12

Digitaalikkut imaluunniit pisanik immersuiffissaq aqqutigalugu pisanik nalunaaruteqartarneq

§ 30. Umimmaat pisat aamma pissatat tamarmik akuersissummik pigisaqartumit piniarnermut piffissaliussap naammassineqarnerata kingornatigut kingusinnerpaamik sapaatit akunnerisa marluk qaangiunneranni ima nalunaarutigineqassapput:

- 1) pisanik digitaalikkut nalunaaruteqarnissamut aqqissuussaq aqqutigalugu, imaluunniit
- 2) pisanik nalunaaruteqarnissamut immersuiffissamik kommunimut utertitsinikkut.

Imm. 2. Imm. 1, nr. 2, malillugu nalunaarutigineqartut ataatsimoortillugit piniarnermut piffissaliussap naammassineqarnerata kingornatigut kingusinnerpaamik sapaatip akunnerisa sisamat qaangiunneranni kommunimit tutum@nanoq.gl aqqutigalugu Piniarnermut Naalakkersuisoqarfimmut nassiunneqassapput.

Imm. 3. Akuersissutip tunuaniittoq pisanik nalunaaruteqarnissamut immersuiffissaq imaluunniit pisanik digitaalikkut sapinngisamik kingusinnerpaamik uumasup angallammut pisap assartorneqarnissaanut atugassamut ikinerani immersorneqareersimassaaq.

Kapitali 13

§ 31. Umimmaat pisat pissatallu tamarmik naak § 30-mi aalajangersagaqaraluartoq www.sullissivik.gl aqqutigalugu imaluunniit PINIARNEQ-mi ukiumoortumik immersuiffissaq atorlugu akuersissummik pigisaqartumit Piniarnermut Naalakkersuisoqarfimmut tutum@nanoq.gl aqqutigalugu nalunaarutigineqassapput.

Imm. 2. Nalunaarutiginninneq ukiumi pineqartumi kingusinnerpaamik 15. oktobarimi pissaaq.

Kapitali 14

Nakkutilliineq

§ 32. Kinaluunniit piniarnermik nakkutilliisunit umimmanniarsinnaatitaanini uppersaqqullugu qinnuivigineqartup akuersissut atuuttoq kiisalu piniarsinnaanermut allagartaq atuuttoq takutissavai.

Kapitali 15

Immikkut akuersissuteqartarneq

§ 33. Piniarnermut Naalakkersuisoqarfik nalunaarummi matumani aalajangersakkanit ilisimatusarnikkut aamma ilinniartitsinermit atatillugu immikkut akuersissummik tunniussisinnaavoq, tassunga ilanngullugu ilisimatusarnermik siunertalinnut umimmannik toqutsisinnaanermut allakkatigut akuersissummik tunniussisinnaalluni.

Imm. 2. Imm. 1 malillugu immikkut akuersissuteqartarnermi piumasarineqarpoq ilisimatusarnermik aamma ilinniartitsinermit atatillugu siunertat uumasunik illersuineq pillugu kiisalu uumasut peqqinnerat pillugu maleruagassat atuuttut malillugit ingerlanneqassasut.

Imm. 3. Imm. 1 malillugu immikkut akuersissuteqarnerit Naalakkersuisut quppersagaanni tamanut saqqummiunneqassapput.

§ 34. Umimmaat navianartorsiortitsisut imaluunniit angallannermit atatillugu annertuumik akornusersuisut qimaatinneqarsinnaasimangippata allakkatigut Piniarnermut Naalakkersuisoqarfimmut qinnuteqarnikkut toqunneqarsinnaapput. Saklut imassallu § 16-imi piumasaqaatinut naapertuuttussaapput.

Imm. 2. Umimmaat imm. 1 naapertorlugu toqutat Kalaallit Nunaanni Namminersorlutik Oqartussanut pigisassanngortinneqassapput.

Imm. 3. Umimmammik toqutsinermi akisussaasup ullorsiutit malillugit kingusinnerpaamik ullut pingasut qaangiutsinnagit toqutsinerup qanoq ingerlasimanera Piniarnermut Naalakkersuisoqarfimmut nalunaarutigissavaa.

Imm. 4. Umimmaap imm. 1 malillugu toqunneqartup qanoq pineqarnissaa Naalakkersuisoqarfiup aalajangissavaa.

§ 35. Naak § 14-imi imm. 4-mi aalajangersagaqaraluartoq aqutsinermi pissutsit aallaavigalugit piniarnermut allagartap 1. maaji sioqqullugu akilerneqarsimanissaa pillugu piumasaqaatip tamanut

atuuttumik atuutinneqannginnissaa Naalakkersuisup piniarnermut akisussaasup immikkut ittumik akuersissutigisinnaavaa.

Imm. 2. Naak § 6-imi, imm. 2, aalajangersagaqaraluartoq aqutsinermi pissutsit immikkoortut aallaavigalugit, soorlu assersuutigalugu ataqatigiinnermut attaveqarfii pingaarluinnartut eqqaanni umimmaat akornusiisut, umimmaat 15. juulimiit 30. aprili ilanngullugu piniarneqarsinnaanissaat Naalakkersuisup piniarnermut akisussaasup immikkut ittumik akuersissutigisinnaavaa.

Kapitali 16

Pineqaatissiissuteqartarnej

§ 36. Kalaallit Nunaanni pinerluttulerinermut inatsimmi malittarisassat malillugit makku akiliitsinermik kinguneqarsinnaapput:

- 1) pissutsinik nalunaarutip imarisaanut attuumassuteqartunik pisortanut oqartussaasunut eqqunngitsunik paatsuungatitsisinnaasunilluunniit paasissutissiineq,
- 2) § 3 naapertorlugu eqqissisimatitsineq pillugu aalajangersakkanik imaluunniit § 6, imm. 1-mi aamma 2-mi, imaluunniit § 9, imm. 1-mi, immikkut ilanngunneqanngitsunik unioqqutitsineq,
- 3) akuersissummi § 14 naapertorlugu tunniunneqartumi piumasaqaatinik unioqqutitsineq,
- 4) § 15 naapertorlugu tunisineq pillugu piumasaqaatinik unioqqutitsineq,
- 5) sakkunik imassanillu atuinissaq pillugu malittarisassanik unioqqutitsineq, §§ 16 aamma 22 takukkit,
- 6) piniutit piniariaatsillu akuerisaasut pillugit malittarisassanik unioqqutitsineq, §§ 17 aamma 23 takukkit,
- 7) umimmaap pisarineqartup ilaanik § 18-imut akerliusumik qimatsineq,
- 8) umimmammik pissanneqarsimasumik eqqortumik piaarnerpaamillu toqutsinissaq pillugu pisussaaffinnik naammassinninnginneq, imaluunniit umimmak pissanneqartoq nanineqanngippat oqartussaasunut attuumassutilinnut piniarnerup naammassineqarnerata kinguinnguutigut pissutsit piviusut pillugit ilisimatitsinnginneq, § 19, imm. 1-3, takuuk,
- 9) umimmammik pissanneqarsimasumik eqqortumik toqutsinissaq pillugu pisussaaffinnik naammassinninnginneq, piffissap piniarfiusup avataani umimmammik toqunneqarsimasumik angerlaassineq imaluunniit pisimasut pillugit oqartussaasunut attuumassutilinnut piffissaq eqqorlugu ilisimatitsinnginneq, § 20, imm. 1, 3 aamma 4, takukkit,
- 10) piniarnissamut piffissaliussap avataatigut umimmannik toqunneqarsimasunik inatsisinik unioqqutitsisumik angerlaassineq, § 20, imm. 2 takuuk,
- 11) umimmannik akiliuteqarluni aallaaniarnermi pisarineqartunik pisanik nalunaaruteqarnissamut periutsit aalajangerneqartut aqutigalugit pisanik nalunaaruteqannginneq, § 24 takuuk,
- 12) assartuutininik motoorilinnik umimmannik piniarnissamut imaluunniit ungoorinissamut atuineq imaluunniit umimmannik uumasunut minnerpaamik 500 meter-inik ungasissuseqannginneq, § 25 takuuk,
- 13) § 28-mut akerliusumik umimmammik passussineq,
- 14) pisanik imaluunniit pissatanik paasissutissanik piumasarineqartunik piffissaliussap iluani nalunaaruteqannginneq imaluunniit malittarisassat atuuttut malillugit pisanik nalunaaruteqarnissamut immersuiffissamik immersuinnginneq, § 30, imm. 1 aamma 3, takuuk,
- 15) piffissaliussap iluani imaluunniit nalunaaruteqarnissamullu periutsit aalajangerneqartut atorlugit Piniarnermut Naalakkersuisoqarfimmut paasissutissanik piumasarineqartunik nalunaaruteqannginneq, § 31 takuuk,

16) § 32 malillugu peqqussummik nalunaarutigineqarsimasumik malinninnginneq, imaluunniit
17) nalunaarummi § 33 aamma § 34 naapertorlugu immikkut akuersissuteqarnermut imaluunniit
akuersissummut piumasaqaatinik malinninnginneq.

§ 37. Nalunaarummi matumani aalajangersakkanik unioqqutitsineq piniarneq aallaaniarnerlu pillugit
Inatsisartut inatsisaanni §§ 41-46 naapertorlugit arsaarinninnermik kinguneqarsinnaavoq.

Kapitali 17

Atulersitsinermut atorunnaarsitsinermullu aalajangersakkat

§ 38. Nalunaarut manna ulloq 1. agusti 2025-mi atuutilerpoq.

Imm. 2. Peqatigitillugu umimmaat illersugaanerak piniagaaneralu pillugit Namminersorlutik Oqartussat
nalunaarutaat nr. 8, 27. juuni 2013-imeersoq, atorunnaarsinneqarpoq.

Kalaallit Nunaanni Namminersorlutik Oqartussat, ulloq 22. juli 2025

Peter Borg (atsior.)

Aalisarnermut, Piniarnermut, Nunalerinermut Imminullu Pilersornermut Naalakkersuisoq

/Emanuel Rosing (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

